

Inatsisartut Siulittaasuata ilassinninnernut angalanernullu aningaasartuuteqartarneranut, akeqanngitsunik ajunngitsorsiaanut tunissutinillu pissarsisarneranut malittareqqusat.

Inatsisartuni Naalakkersuisunilu il.il. ilaasortat aningaasarsiaqartitaanerat il.il. pillugit Inatsisartut inatsisaanni nr. 22-mi, ulloq 18. december 2003-meersumi § 19 naapertorlugu aalajangersarneqarpoq:

Kapitali 1 *Ilassinninneq*

§ 1. Inatsisartuni Naalakkersuisunilu il.il. ilaasortat aningaasarsiaqartitaanerat il.il. pillugit Inatsisartut inatsisaat naapertorlugu Inatsisartut Siulittaasuata Nunatta Karsiata akiligaanik ilassinninnermut aningaasartuuteqarsinnaatitaavoq.

§ 2. Ilassinninnermut aningaasartuutit Inatsisartut Siulittaasuannit atorineqartut Namminersorlutik Oqartussat soqutigisaanni Inatsisartullu Inatsisartulluunniit Siulittaasoqarfiat sinnerlugit atorineqassapput.

Imm. 2. Ilassinninnermut aningaasartuutinik atuinermi immikkut ittumik pissutissaqartoqassaaq.

Imm. 3. Ilassinninnermut aningaasartuutit nerisitsinerusinnaapput tunissutaasinnaallutilluunniit.

Imm. 4. Ilassinninnermut aningaasartuutinik atuinermi akikinnerpaatitsiniartoqartassaaq. Aningaasartuut pissutaasumut naapertuutissaaq, annertunerunani.

Imm. 5. Ilassinninnermut aningaasartuutit tupanik pisinernut atorineqarsinnaanngillat.

§ 3. Neriniartarfimmi imaluunniit Hans Egedep Illuani, nammineq angerlarsimaffigisami allaniluunniit aqqissuussisoqartillugu nerisassaqartitsilluni il.il. ilassinninnermut aningaasartuutinik atuinermi pisuni ataasiakkaani tamani allakkiortoqartassaaq takutillugu aningaasartuutit Nunatta Karsianit akileneqarnissaat Namminersorlutik Oqartussat soq soqutigisarinerat. Ilanngullugu allakkiamut aningaasartuuteqarnermi siunerineqartoq allanneqassaaq aammalu inuit peqataasut ataasiakkaat imaluunniit eqimattakkuutaat kikkuunerat nalunaarneqassalluni, tak. § 20, imm. 1. Allakkiaq Inatsisartut Siulittaasuannit atsiorneqassaaq aningaasartuutillu naatsorsuutini atugassat uppersaataannut ilanngullugu kakkiunneqassalluni. Inatsisartut Siulittaasuata aqqissuussinnermi nammineq peqataasimanngikkuni, Inatsisartut Siulittaasuata sinnerlugu peqataasimasup allakkiaq atsiussavaa.

Imm. 2. Imm. 1-imi taaneqartumi ilassinninnermi, peqataasumut ataatsimut aqqissuussinnermi ataatsimi aningaasartuutit 800 kr.-it qaangissanngilai, matumani aqqissuussinnerit pisortatigoortumik sinniisut Namminersorlutik Oqartussat avataaneersut, naalakkersuisutut, inatsisartut siulittaasuattut imaluunniit qaffasinnerusumik inissisimasut peqataanerit pineqanngippat.

Imm. 3. Nersornaammik tunniussinnermut atatillugu immikkut qaaqqusanut ilasseqatigiissitsisoqarsinnaavoq aningaasatigut killiliussat tamarmiusut 10.000 kr.-it iluanni. Aningaasatigut killiliussat nerisitsinnermut, sassaalliinnermut pisariaqarpallu aliikkusersuinnermut ininillu attartornermut atorineqarsinnaapput. Nersornaaserneqartussap imaluunniit nersornaaserneqartussap aapparisaata, inooqataata meeraasaluunniit il.il. angalanerinit aningaasartuutit matussuserneqarnissaannut tapiissuteqartoqarsinnaanngilaq. Tamatuma saniatigut killiliussat § 4, imm. 3-mi taaneqartut iluanni tunissuteqartoqarsinnaavoq.

§ 4. Inunnut ataasiakkaanut Namminersornerullutik Oqartussanut imaluunniit Namminersorlutik Oqartussanut immikkut pingaarteqartunut imaluunniit pingaarteqarsimasunut tunissutit

ilassinninnermut aningaasartuuteqartoqarsinnaavoq. Tunissutit taamaattut akunnaatsuni inuissiornermut atasumik, tassa 50-inik, 60-inik, 70-inik, 80-inik, 90-inik aamma 100-nik ukioqalersunut, ukiut 25-nngortorsiorlugit, 40-nngortorsiorlugit imaluunniit 50-inngortorsiorlugit atorfeqarnermi nalliuttorsiorlutit, katinnermi, ukiut 25-nngortorsiorlugit aamma ukiut 50-inngortorsiorlugit katiffissiornermi aamma toqusoqarnerani tunniunneqarsinnaapput. Pisuni ataasiakkaani immikkut tamani tunissutinut pisumi pineqartumi pisarnernut naleqquttut isigineqartumik aningaasartuuteqartoqarsinnaavoq. Taamaattoq pisuni taamaattuni ataasiakkaani aningaasartuutit 1.200 kr.-it sinnerneqassanngillat.

Imm. 2. Inatsisartunut ilaasortat 60-iliillutik aamma 70-iliillutik inuissiornerinut kiisalu inatsisartunut ilaasortap inatsisartunut ilaasortaanerminik ukiunik 25-iliineranut atatillugu, taamatuttaaq Hans Egedep Illuani ilassinnittoqarsinnaavoq Inatsisartunut Naalakkersuisunullu ilaasortanit, kiisalu inatsisartunut ilaasortap pineqartup aappaanit meeraanillu peqataaffigineqartumik aningaasatigut killiussat 10.000 kr.-it tikillugit iluanni. Aaqqissuussinnermut atatillugu angalanernut aningaasartuuteqartoqarsinnaanngilaq.

Imm. 3. Pisuni allani imm. 1-imi taaneqartut saniatigut ilassinninnermut tunissuteqarnikkut innunut ataasiakkaanut imaluunniit allanut immikkut qujassuteqarfigisariaqarlutik nersortarialinnik suliaqarsimasunut aningaasartuuteqartoqarsinnaavoq. Tunissutit taamaattut tassaasinnaapput soorlu naasut aamma atuakkat il.il. Taamaaliormermi aningaasartuutit pinerit tamaasa 500 kr.-it sinnissanngilaat.

Imm. 4. Suliffeqarfinnut, matumani aamma ilanngullugit Namminersorlutik Oqartussat ataani suliffeqarfinnut, suliffinnut, peqatigiiffinnut imaluunniit kattuffinnut Kalaallit Nunaanni angerlarsimaffeqartunut imaluunniit Kalaallit Nunaannut immikkut pingaarutilinnut ilassinninnermut aningaasartuutit atuinikkut tunissuteqartoqarsinnaavoq. Tamanna suliffeqarfiup il.il. pineqartup nalliuttorsiorluni aaqqissuussinerani imaluunniit ukiumoortumik nalliuttorsiornerani imaluunniit allamik immikkut ittumik pissuteqarluni aaqqissuussinerani pisinnaavoq. Pisuni taamaattuni ataasiakkaani aningaasartuutit 5.000 kr.-it tikillugit atorneqarsinnaapput.

Imm. 5. Aaqqissuussinerni pisortatigoortumik Namminersorlutik Oqartussat avataannit sinniisut, ministerit, inatsisartunut siulittaasuattut imaluunniit qaffasinnerusumik inissisimasut peqataaffigisaanni, imm. 1-imi kiisalu 3-4-mi pisuni taaneqartut qaangerlugit aamma aalajangersakkani aningaasat amerlassusissaat qaangerlugit tunissutinut aningaasartuutit atorneqarsinnaapput.

Imm. 6. Tunissuteqarnissamut aningaasartuuteqarnissamik nassataqartussamik pilersaaruteqartoqarpat, pisuni ataasiakkaani imm. 1 kiisalu 3-4-mi taaneqartumik aningaasartaliussat qaangerlugit imaluunniit pisuni allani, aalajangersakkani taaneqartut avataaniittunut tunissuteqartoqarnissaanik pilersaaruteqartoqarpat, taamaaliornissamut Siuttaasoqarfimmit tamanna sioqqullugu akuersissummik pissarsisoqaaqqaassaaq. Akuersissut aningaasartuutaasut naatsorsuutinut nalunaarsuinermi uppenarsaammut ilanngullugu kakkiunneqassaaq.

Imm. 7. Inatsisartut Allattoqarfiata suliffeqarfiini sulisorisanut, suliffimmit soraarnermut atatillugu imaluunniit immikkut ittumik pissuteqarluni sulisorisanut tunissutit, ilassinninnermi aningaasartuutit isigineqassanngillat sulisoqarnermulli aningaasartuutit isigineqassallutik.

§ 5. Inatsisartut aaqqissugaannik isummersoqatigiissitsinernut, isumasioqatigiinnernut, tusarniaanernut assigisaannulluunniit aningaasartuutit ilassinninnermut isigineqarneq ajorput. Tamanna aamma atuuppoq Inatsisartut ataatsimiinnerisa nalaanni nalinginnaasumik sutugassaqartinneqarnermut, taakkununga ilanngullugit siulittaasut atuunnerminut atatillugu Siulittaasup Inatsisartuni ataatsimeeqateqarnerinut sutugassanut aningaasartuutit.

Imm. 2. Inatsisartuni atorfilinnut aappaannullu aningaasartuutit ilassinninnermut aningaasartuutit isigineqaratik sulisoqarnermut aningaasartuutit isigineqassapput Inatsisartullu Allattoqarfiata kontuanut kontulerneqassallutik.

Imm. 3. Aaqjissuussinerni aningaasartuutit agguarnissaat aalajangerneqarsinnaanngippata, aningaasartuutit missiliorlugit agguarneqarsinnaapput.

§ 6. Atortunut ussasaarutitut pissusilinnut Inatsisartut Namminersorlutik Oqartussalluunniit taaguutaanik ilisarnaataanilluunniit naqinnilerlugit immikkut suliaritinneqartunut aningaasartuutit ilai annikinnerusut, aningaasartuutitut uppersaatit naatsorsuutitut ilanngunneqartussanut piunasaqaatit, siunertamut, peqataasunut il.il. tunngasut, ilassinninnermut aningaasartuuteqarnermi piunasaqaataasartut naammassinngikkaluarlugit aammalu 200 kr.-it sinnernagit nalillit Inatsisartut ilassinninnermut kontuanit akilerneqarsinnaapput.

§ 7. Piffissami Inatsisartunut qinersisoqarnissaanik nalunaaruteqarnerup qinersinerullu ingerlanneqarnissaata akornanni ilassinninnermut aningaasartuuteqartoqarsinnaavoq aatsaat Inatsisartut Siulittaasoqarfiannit isumaqatigiissumit aalajangersimasumik siumullu akuerineqarenikkut.

Kapitali 2

Angalanermi aamma najugaqarnermi aningaasartuutit

§ 8. Aningaasarsiaqartitaaneq pillugu inatsit naapertorlugu Inatsisartut Siulittaasuata Inatsisartut Siulittaasuattut angalanerinit aningaasartuutit matussuserneqartartussaapput. Nerisaqarneq aamma najugaqarneq akiligassiisoqarnera malillugu akilerneqassapput kingornalu malitsigisaanik Nunatta Karsianut akilertinneqarlutik. Inatsisartut Siulittaasuata akiligassiisarluni angalanissani kissaatiginngippagu, taarsiullugu malittarisassat Inatsisartunut ilaasortanut allanut atuuttut malillugit ullormusiaqartitsisoqassaaq.

Imm. 2. Angalanermit akunnittarfinnullu aningaasartuutit taamaallaat matussuserneqarsinnaapput sulinermit atatillugu aningaasartuutaagunik. Aningaasartuutaanerisut assersuutigalugu uninnganerup sivitsorneqarneranik, illoqarfiup angerlarsimaffigisap aqqusaarneqarneranik allatulluunniit toqqaannartumik aqquasaasumik saneqqutsinermik pissuteqartut sulinernullu atatinneqarsinnaanngitsut matussuserneqarsinnaanngillat. Tamanna aamma atuuppoq ornitami angallanneqarnermit sulinermit tunnganngitsunut.

Imm. 3. Qimuttuitsut timmisartullu atorlugit angalanerni nalunaaquttap akunnerinit pingasunit sivilisunerisuni 1. klasse imaluunniit assigisaa atorneqarsinnaavoq. Akunnittarfinni unnuinerni juniorsuite, superior room assigisaaluunniit, ullaakkorsiorneq ilanngullugu unnuinermut ataatsimut annerpaamik 1.900 kr.-inik akeqarsinnaasoq, atorneqarsinnaavoq. Sapinngisamik akunnittarfiit naalagaaffimmut isumaqatigiissummut ilaasut atorniarneqartassapput.

Imm. 4. Inatsisartunut Siulittaasoq aamma Inatsisartut Allattoqarfiani atorfillit angalanermi ataatsimut angallassisumik atugaqarpata, peqataasullu tamaasa immikkoortillugit qanoq akiliuteqarnissaanik akiligassamik suliaqartoqarani, peqataasut amerlassusaat naapertorlugit aningaasartuutitut akiligassaq agguarneqassaaq. Aningaasartuutit ilai, Inatsisartunut Siulittaasumut tunngatinneqartut, Inatsisartut kontuannit akilerneqassapput, aningaasartuutillu peqataasunut allanut tunngasut, Inatsisartut Allattoqarfiata kontuannit akilerneqarlutik. Ataatsimulli taxanit angallanneqarnermit aningaasartuutit Inatsisartut kontuanit akilerneqassapput.

Imm. 5. Nerisaqarnermit aningaasartuuteqartoqartillugu ullup qeqqasiornermut aningaasartuutit 300. kr.-init unnukkorsiornermullu aningaasartuutit 400 kr.-init amerlaneroqqusaanngillat. Ullup unnuallu ataatsip ingerlanerani aningaasartuutit tamarmiusut 800 kr.-init amerlaneroqqusaanngillat.

Angalanerit pinerit tamaasa qaangiunneranni tamakkiisumik naatsorsuusiortoqartassaaq akiliutissallu inaarutaasut isumannaarneqarlutik. Siusinnerusukkut akiliutissanik inaarutaasumik isumannaarinermi aningaasartuutaasut aningaasartuutissatut killiliussanit annikinnerunerat naatsorsuusiornermi sunniuteqassanngilaq.

Imm. 6. Inatsisartut Allattoqarfiani atorfilik, atorfeqarnermut atatillugu angalaqataasoq Inatsisartunut Siulittaasup nerisaata assinganik nereqataappat, aalajangersagaq imm. 5-imiittoq assingusumik atuutsinneqassaaq. Pisuni taamaattuni aningaasartuutigineqartut ilai, atorfilimmut tunngatinneqarsinnaasut Inatsisartut Allattoqarfiata kontuanit akilerneqassapput. Qummut killiliussatut aalajangersakkat sipporlugit aningaasartuutaajunnartut atorfillip nammineq akilissavai. Atorfilinnut atatillugu aammattaaq ullormusiassat ilanngaaffigineqassapput, imaattoqarpat, matuma malitsigisaanik atorfeqarnermut atatillugu angalanermi amerlanerusunik aningaasartuuteqarnermi ajunngitsorsiassat pillugit maleruagassat nalinginnaasut tamatumunnga tunngasut malillugit.

Imm. 7. Inatsisartut Siulittaasuanut atisanik pisinermut aningaasartuuteqartoqarsinnaanngilaq. Taamaattorli pisortatigoortumik aaqqissuussinerni peqataanermi, nalliuttorsiornermi atisat immikkut ittut atorneqartussaattillugit, nalliuttorsiornermi atisanik attartornermut aningaasartuuteqartoqarsinnaavoq.

§ 9. Aningaasarsiaqartitaaneq pillugu inatsit naapertorlugi Inatsisartunut Siulittaasuata pisuni immikkut ittuni aapparisanik imaluunniit inooqatigisani Inatsisartut Siulittaasuattut angalanermi peqatigisinnaavaa. Taamaaliorsinnaaneq aatsaat atorneqassaaq Namminersorlutik Oqartussat avataanniit pisortatigoortumik sinniisup, soorlu ministerip, inatsisartunut siulittaasuattut imaluunniit qaffasinnerusumik inissisimasup peqataasup aapparisa imaluunniit inooqatigisaa aaqqissuussinernut atasumik peqataappat. Aalajangersakkat § 8, imm. 1 - 5 aamma imm. 7, aammattaaq aapparisa imaluunniit inooqatigisamut angalaqataasumut assingusumik atuupput.

Imm. 2. Aapparisa imaluunniit inooqatigisap atorfeqarnermut atasumik angalanermi peqatiginissaannut imm. 1-imi taaneqartunik allaanerusunik pissutissaqarpat, taamaaliornissaq sioqullugu Inatsisartut Suleriaatsimut Ataatsimiititaliaannit akuersissummik pissarsisoqqaassaaq. Aningaasartuutit naatsorsuutitut nalunaarsorneqarneranni aningaasartuutitut uppersaatitut allagartamut akuersissut kakkiunneqassaaq.

§ 10. Nunanit allanit nunaniluunniit allani pisortatigut tikeraartoqartillugu, Nersornaammik tunisisoqartillugu imaluunniit qaffasinnerusumik pisortatigut aaqqissuisoqartillugu, angalanermut, ineqarnermut il.il. Inatsisartut Siulittaasoqarfianiinngitsunik Inatsisartulluunniit Allattoqarfianiinngitsunik aappaasunillu aningaasartuutissat pisariaqartinneqarpata, aningaasartuutit taamatut ittut Inatsisartut Suleriaatsimut Ataatsimiititaliaata aalajangerneqartigut ilassinninnertut aningaasartuutaasinnaapput.

Kapitali 3

Akeqanngitsumik ajunngitsorsiat

§ 11. Inatsisartut Siulittaasuannut atorfeqarnermi biileqartinneqassaaq aalajangersimasumik ingerlatsisoqanngitsumik.

Imm. 2. Inatsisartut Siulittaasuata atorfeqarnermi biileqartinneqarnermut taarsiullugu Nuummi angallanneqarnermut taxanik atortarnissaq toqqarpagu ukiumoortumik najukkami angallanneqarnermut tapisiaqartitsisoqassaaq akeqanngitsumik biileqartinneqarnerup akileraartarnikkut naleqartinneqarneranut naapertuuttumik; taanna ullumikkut 60.000 kr.-iuvoq. Inatsisartut Siulittaasuata ukioq tamaat siulittaasuusimangippat najukkami angallanneqarnermut tapisiaq qaammatit tamaasa pineqartup siulittaasuuffigisaasa aallartinneri tamaasa najukkami

angallanneqarnermut tapisiaq aqqaneq marlunngorlugu aggorneranik ataatsimik annertussuseqassaaq. Najukkami angallanneqarnermut tapisiaq Inatsisartut Allattoqarfiannit akileraartarnermik oqartussanut nalunaarutigineqassaaq.

Imm. 3. Nuummi taxanit angallanneqarnermut aningaasartuutit utertinneqarsinnaanngillat. Inatsisartut Siulittaasuat atorfeqarnermi biileqartinneqarpat, taamaattoq sulinermit atatillugu nereqatigiinnernut, ilassinninnernut taamaaqataanullu aqqissuussinernut imigassallerfiusunut peqataanernut atatillugu Nuummi taxanit angallanneqarnermut aningaasartuutit utertinneqarsinnaassapput. Utertinneqarsinnaanissaannut piunasaqaataavoq taamatut angallanneqarnermut aalajangersimasumik pissutaasup taxarnermut uppernaasammut nalunaarneqarsimanissaa.

Imm. 4. Inatsisartut Siulittaasuannut atorfeqarnermut atatillugu biileritinneqartoq pissarsiarineqarnermini annerpaamik 375.000 kr.-inik akeqarsinnaavoq. Atorfeqarnermut biilit allat tunineqarneranit isertitat killiliussanut ilanngunneqarsinnaanngillat. Atorfeqarnermut atatillugu biili siusinnerpaamik ukiut arfinillit ingerlareerpata taarserneqarsinnaavoq.

§ 12. Inatsisartut Siulittaasuat akeqanngitsumik atorfeqarnermut atatillugu angallattakkamik oqarasuaateqartinneqarlunilu angerlarsimaffimmini aalajangersimasumik ikkuffilimmik oqarasuaateqartinneqarsinnaatitaavoq.

Imm. 2. Aaqqissuussineq Inatsisartut Allattoqarfinnit akileraartarnermik oqartussaasunut nalunaarutigineqassaaq.

§ 13. Inatsisartut Siulittaasuat angerlarsimaffimmini akeqanngitsumik aalajangersimasumik attavilimmik qarasaasiaqartinneqassaaq, angallattakkamik qarasaasiaqartinneqassalluni naqiterissuteqartinneqassallunilu.

Imm. 2. Inatsisartut Siulittaasuat angerlarsimaffimmini qarasaasiamiit akeqanngitsumik internettimik atuisinnaatitaavoq.

Imm. 3. Aaqqissuussineq Inatsisartut Allattoqarfiannit akileraartarnermik oqartussanut nalunaarutigineqassaaq.

§ 14. Inatsisartut Siulittaasuat aningaaserivinnit allagartanik akiliutaasartunik korteqartinneqarsinnaavoq. Allagartaq sulinermit atatillugu taamaallaat atorneqarsinnaavoq. Allagartaq suliamut atatinngu atorneqartillugu atorunnaarsinneqartassaaq.

§ 15. Inatsisartut Siulittaasuat, Inatsisartunut ilaasortat allat assigalugit, sulinermit atatillugu angalanernut atatillugu ajoqusernerit matussuserneqartarnissaannik Namminersorlutik Oqartussat sillimmasersimanerannut ilaatinneqarpoq. Ajoqusernerit sillimmasersimanermit matussuserneqarsinnaanngitsut Nunatta Karsiata susassarinnilai.

§ 16. Inatsisartut Siulittaasuat atorfimmu atsumik, maleruagassat aningaasarsiaqartitaanermut inatsimmi aalajangersakkat naapertorlugit, ineqartinneqassaaq. Aaqqissuussineq Inatsisartut Allattoqarfinnit akileraartarnermik oqartussaasunut nalunaarutigineqassaaq.

Imm. 2. Inatsisartut Siulittaasuata pequsersukkamik ineqartinneqarnissaaq kissaatigippagu, Inatsisartunit pequsersuineq isumagineqassaaq. Tamatumunnga aningaasartuutaasussat Inatsisartut Suleriaatsimut Ataatsimiititaliaanit akuerineqaaqartassapput. Pequtit il.il. pisarineqartut Inatsisartut Allattoqarfiannit pigisat allattorsimaffianni nalunaarsorneqassapput.

Imm. 3. Pequsersukkamik inigisaqartitsisoqarpat, pigisat inummut tunngalluinnartut nutsernermi pigisat assartorneqarnerannut il.il. aningaasartuutit tunngassuteqartut taamaallaat akilerneqassapput,

Namminersorlutik Oqartussani atorfillit pequsersukkamik ineqartinneqartut pineqarnerat assigalugu.

Imm. 4. Imermut, kiassarnermut innaallagissamullu atukkamut kiisalu aputaajaanermut aningaasartuutit Nunatta Karsianit matussuserneqartassapput. Tamanna aamma atuuppoq qaammatit affakkaarlugit marloriarluni eqqiaanermut, pinerit tamaasa 8 tiiminik sivilissusilimmut imaluunniit sisamariarluni pinerit tamaasa 4 tiiminik sivilissusilimmut aammalu aasaanerani igalaat qaammatikkuutaartumik salinnerinut aningaasartuutitut. Atorfimmut atasumik inigisamut aningaasartuutit allat Nunatta Karsianit matussuserneqarsinnaanngillat.

§ 17. §§ 11-16-imi taaneqartut saniatigut Inatsisartut Siulittaasuut allanik akeqanngitsunik ajunngitsorsiaqartinneqarsinnaanngilaq.

Kapitali 4

Aningaasaliissutit killissaat aamma akuersissuteqartarneq il.il.

§ 18. Inatsisartut Siulittaasuut ukiumut ilassinninnermut 400.000 kr.-it tikillugit aningaasartuuteqarsinnaavoq. Inatsisartunut Siulittaasuusoq ukioq tamaat Inatsisartunut Siulittaasuusimannigippat, ilassinninnermut aningaasat atugassat 400.000 kr.-inik 1/12-ii qaammatit aallartinneranni tamani annertussuseqassapput, pineqartup Inatsisartunut siulittaasuunerani.

§ 19. Inatsisartunut Siulittaasuuta Siulittaasoqarfiullu suliaqarnermut atatillugu angalasarnerinut aningaasartuutit killissaannik Inatsisartut Suleriaatsimut Ataatsimiititaliaat aalajangersaassaaq.

§ 20. Inatsisartunut Siulittaasoq, Nunatta Karsiata akiligaanik ilassinninnermut aningaasartuutini atuisoq, naatsorsuutitut atugassani uppersaatinut ataasiakkaanut aningaasartuutini atuinerup siunertaa allassavaa, aamma inuit peqataasut kikkuneri ataasiakkaarlugit imaluunniit eqimattannorlugit ilanngullugit allassavai.

Imm. 2. Ilassinninnermut aningaasartuutitut uppersaatit Inatsisartunut Siulittaasumit atsiorneqassapput.

Imm. 3. Imm. 2 naapertorlugit atsiornermigut Inatsisartut Siulittaasuut uppersaassaaq, aningaasartuutit ilassinninnermut tunngasut, aamma aningaasartuutitut akiliuteqarneq aningaasaliissutitut matusissutissaqartut.

§ 21. Maleruaqqusanik ukunani aalajangersakkat malinneqarnissaannut, matumani aningaasaliissutitut killiussat malinneqarnissaat pineqartumut tunngatillugu ilassinninnermut aamma angalanermut aningaasaliissutitut tunngasut ilanngullugit Inatsisartut Siulittaasuut akisussaavoq.

Imm. 2. Inatsisartut Allattoqarfiata aningaasartuutitut allanut tunngasut Inatsisartut ilassinninnermut kontuanit akilernerneqartut pillugit suliassanik naatsorsuutinullu nalunaarsuineq kiisalu missingersuutitut naleqqiussisarluni malinnaaneq isumagissavaa.

Imm. 3. Maleruaqqusani ukunani saneqqunneqanngikkunik, Namminersorlutik Oqartussani naatsorsuserinnermut aalajangersakkat qaqugumulluunniit atuuttut aamma Inatsisartut Siulittaasuuta ilassinninnermut, angalanernut uninnganermullu aningaasartuutigisartagaanut atuupput. Taamaattumik aamma aalajangersakkat taamaattut maleruaqqusamut matumunnga ilanngullugit malinneqassapput.

§ 22. Aningaasartuut maleruaqqusat uku naapertorlugit Nunatta Karsianit akilernerneqartussaannigikkaangat, aningaasartuut Inatsisartut Siulittaasuut imaluunniit Inatsisartut

Siulittaasoqarfianni ilaasortamit siulittaasoq sinnerlugu aningaasartuuteqarnermut akisussaasimasumit namminermit akilerneqassaaq, taamaattoq § 8, imm. 6 takuuk.

Imm. 2. Imm. 1 naapertorlugu akiligassanngortut aningaasarsiassanit ilanngaatigineqarsinnaapput.

Imm. 3. § 8, imm. 6 naapertorlugu akiligassanngortut sulisup akissarsiaanit ilanngaatigineqarsinnaapput.

Kapitali 5

Tunissutisineq

§ 23. Tunissutit, Inatsisartut Siulittaasuata siulittaasutut tunissutisiai, Inatsisartut pigisassaraat Inatsisartullu Allattoqarfiannit nalunaarsorneqassallutik. Tamatumanili pineqanngillat tunissutit 500 kr. inorlugu naleqassasutut nalilerneqartut, kiisalu tunissutit namminermit atatillugu atugassatut naatsorsuussat.

Kapitali 6

Kikkut tamat paasitinneqarsinnaatitaanerat


§ 24. Maleruaqqusat uku naapertorlugit aningaasartuutitut uppersaatit kikkunnit tamanit takuneqarsinnaapput.


Kapitali 7

Atuutilerpera

§ 25. Malittareqqusat uku ulloq 10. oktober 2023 atuutilerput.

Inatsisartut Allattoqarfiat, ulloq 10. oktober 2023


Mimi Karlsen


Ellen Kolby Chemnitz